

**Najib Seru Seluruh Rakyat Malaysia Bersatu Dalam Hiba
Bernama
August 22, 2014**

KUALA LUMPUR, 22 Ogos (Bernama) -- Perdana Menteri Datuk Seri Najib Tun Razak menyeru seluruh rakyat Malaysia supaya bersatu dalam menghadapi suasana hiba serta sama-sama mendoakan dan mengenang mereka yang menjadi mangsa dalam tragedi pesawat Malaysia Airlines (MAS) Penerbangan MH17.

"Saya menyeru seluruh rakyat Malaysia supaya bersatu dalam menghadapi saat-saat memilukan ini dan sama-sama memanjatkan doa.

"Tiada kata-kata yang mampu menggambarkan kesedihan yang dirasai ketika melihat jenazah dibawa pulang, doa dan harapan saya mengiringi mangsa dan keluarga #MH17," kata Najib dalam laman Twitter beliau pada Jumaat.

Najib adalah antara mereka yang berada di Kompleks Bunga Raya Lapangan Terbang Antarabangsa KL (KLIA) di Sepang untuk menghadiri istiadat memberi penghormatan kepada 20 mangsa tragedi itu, yang jenazah mereka tiba di tanah air hari ini.

Yang di-Pertuan Agong Tuanku Abdul Halim Mu'adzam Shah dan Raja Permaisuri Agong Tuanku Hajah Haminah juga berkenan berangkat ke upacara itu, yang diadakan di kompleks bersebelahan bangunan terminal utama KLIA.

Pesawat khas membawa jenazah rakyat Malaysia yang terkorban dalam kejadian di timur Ukraine pada 17 Julai itu, mendarat pada 9.54 pagi dan jenazah kemudian dihantar ke tanah perkuburan yang ditetapkan keluarga masing-masing.

Empat puluh tiga rakyat Malaysia adalah antara 298 orang yang terbunuh apabila Penerbangan MH17, yang dalam perjalanan dari Amsterdam ke Kuala Lumpur, terhempas di Ukraine. Ia dipercayai ditembak jatuh di negara bergolak itu.

-- BERNAMA

Copyright © 2014 BERNAMA

Source: <http://www.bernama.com/bernama/v7/bm/newsindex.php?id=1062467>